

Incumbensa Cahenzli-Philipp concernent in rapport davart la povradad en il Grischun

Durant la crisa da corona è la povradad daventada visibla, er en la ritga Svizra. Umans stevan en colonna davant cuschinas da schuppa, tastgas da palpìri plainas cun victualias vegnivan repartidas da persunas voluntaras ed ovras d'agid han endrizzà svelt ed en moda flexibla raits da distribuziun. La crisa tutga il pli fitg ils pli povers, er en il Grischun.

Tenor la statistica federala (stadi 2018) è mintga 12avla persuna en Svizra povra, in ulteriur milliun umans viva en relaziuns precaras, pia mo pauc sur il cunfin da povradad. Ils onns 2015 fin 2018 èn 20,6 % da la populaziun svizra vegnids classificads almain ina giada sco periclitads da povradad (<https://www.bfs.admin.ch>).

Las consequenzas èn multifaras e per las persunas pertutgadas sco er per la societad èn ellas fatalas. Uffants da famiglias pertutgadas da povradad han dischavantatgs al cumenzament da la vita e pli tard mendras schanzas da furmaziun. Plinavant è la povradad ina ristga da sanadad: «Povradad fa malsaun», sco quai ch'i vegn explitgà en la resposta a la dumonda Caviezel il zercladur 2020. La povradad è displaschaivlamain ertavla: Pervia dal cumenzament difficil da la vita – ch'è caracterisà d'ina promoziun manglusa, da mender nutriment sco er da situaziuns ch'engrevgeschan la psica – han uffants da persunas pertutgadas da povradad gia d'emprim ennà damain schanzas che uffants da chasadas cun meglras resursas monetaras. La consequenza èn savens dischavantatgs per vita duranta ed exclusiun sociala.

Quest ciclus sto vegnir interrut cun agid d'ina prevenziun efficazia d'in cumbat effizient cunter la povradad.

Per quest intent dovri ina savida pli fidada davart la povradad e davart ses motivs. Basas da datas davart la situaziun da persunas pertutgadas da povradad en il chantun ed in'analisa da questa situaziun èn indispensablas e procuran per la savida relevanta per cumbatter sistematicamain cunter la povradad e per prevegnir intenziunadamain a tala. En quest connex na sa tracti betg mo da la dumonda, quantas persunas ch'èn pertutgadas da povradad, mabain er dad indicaziuns davart las suandantas dumondas betg definitivs: Tge facturs influenzeschan la situaziun finanziaria da las abitantas e dals abitants? Tge persunas èn periclitadas e pertge? Tge structures favuriseschan la povradad? Tge grupps da ristga datti en il chantun?

Sin fundament da questas basas pon vegnir formuladas e prendidas mesiras efficazias ed intenziunadas e lur effect po vegnir controllà en intervals regulars.

Sa basond sin questas ponderaziuns incumbenseschan las sutsegnadras ed ils sutsegnaders la Regenza:

1. da suttametter al Cussegl grond in rapport davart la situaziun da persunas pertutgadas da povradad en il chantun Grischun (rapport social).
2. da mussar champs da mesiras per cumbatter cunter la povradad.
3. da far in monitoring da la povradad e da controllar l'efficacità da las mesiras en intervals periodics.

Cuira, ils 28 d'avust 2020

Cahenzli-Philipp, Caviezel (Tavau Clavadel), Della Vedova, Atanes, Baselgia-Brunner, Brunold, Caluori, Cantieni, Casutt-Derungs, Caviezel (Cuira), Crameri, Degiacomi, Föhn, Gartmann-Albin, Hardegger, Holzinger-Loretz, Maissen, Müller (Favugn), Papa, Perl, Preisig, Rettich, Ruckstuhl, Rutishauser, Schwärzel, Thomann-Frank, Tomaschett-Berther (Trun), von Ballmoos, Widmer-Spreiter (Cuira), Wilhelm, Zanetti (Landquart), Bürgi-Büchel, Spadarotto, Tomaschett (Cuira)